

112 年全國語文競賽客家語朗讀文章高中學生組（海陸腔）

編號 1 號

【簡單个幸福】徐姿華原作

打早，涼涼微風並柔柔天光，掀開間房个白紗窗門布，膠正對甜甜夢肚醒來个僵攢手；難得个放棄日，懶在眠床看日頭輕輕徒步、聽窗門外鳥聲吱啣，時間也像恬恬頓腳咧，啊！這靚靚个朝晨。

食飽朝，想去尋久無見面个朋友遶寮。自家駛車，時間扼在自家个手頭町，做得慢慢仔行、定定仔寮；經過鬧熱个街路，車輪仔轉落鄉道，來到苗栗个穀倉——灣裡。路兩片金黃飽米个禾串強強會對田肚淳出來；風吹來，一陣一陣歡喜到手攘腳踏、搖頭扭腰个金黃稻浪，分人心情暢快。田脣企等兩個在該比手畫脚个阿伯，日頭晟來，笠嫵下晒到烏刻刻个面町，單淨看著兩排雪白个牙齒，想來應該當滿意今年係好年冬咧！

幹過一隻大彎幹，共樣係闊野野个田地，直直透到山下；深深淺淺个黃襯等青青个田、綠綠个大樹，像係天公伯个調色盤，乜係這隻豐收季節正有个景色。該向有幾夫既經割忒早冬禾，準備愛過蒔二冬禾个田，田水鮮鮮，將朗朗个藍天膠白雲、田脣个樹仔膠人家个屋，清清楚楚反映出來，斯像框在用田塍做相框裡

肚个相片，實在還靚。這向堵好有一夫田當在該割禾，紅色个割禾機在田肚緊行緊割，三、四個人在脣頭搨手，無閒直掣；割禾機背後跔歸陣白鶴，有兜低頭絡食、有兜大步行尋食、有兜飛高飛低搶食，鬧熱煎煎，這斯係田肚最有生命力个畫面咧！

車仔慢慢仔溜落莊頭，伏在路脣个老狗牯看著車仔來，伸懶筋企起來拂尾，像迎接老朋友樣。一個著花衫个伯姆跔在屋面前个菜園摘菜，菜園分屋蔭等、日頭旨有晒著，青里里个菜葉面還有露水，看起來當萋、當錫人食。兩個國小年紀个細阿哥仔，一儕慢慢仔箭自行車、一儕半行半走、手町還拗等籃球，嘻嘻哈哈有講有笑愛共下去打球仔。這一路个光景，實在分人心情鬆爽。

主人準備好一桌點心、地豆膠瓜子，還有清香个高山烏龍茶，三、四個當久無見面个老朋友，天南地北講到毋知天合地。茶香、情醺，靚靚个日仔、靚靚个心情，這斯係簡單个幸福。

112 年全國語文競賽客家語朗讀文章高中學生組（海陸腔）

編號 2 號

【陂塘】許倩雯原作

用鏡頭記錄臺灣這遍土地个導演齊柏林，坐在直升機頂對天頂看往下，形容桃園个陂塘就像係「散落一地泥个水晶，金若若仔¹！」

兩隻白鶴一前一後在陂塘面頂飛過，白雪雪个身影倒映在平靜个水面。水蓮花²對青青个水肚探出頭，細細蕊个黃花就像天頂緊瞞緊瞞个星仔，靚到耐毋得。

立秋正過啊忒，陂塘就飛來一群準備愛過冬个人客！鬥腳鳥³水紅色个長腳，踩在淺水个位所定定仔行，鳥觜在水竇肚掃來掃去，無閒在該尋食。花刺花刺个細水鴨摺頭那汨落水肚，屎肫翹到半天高。忽然間，一粒扁扁个石頭飛啊過來，嚇到這群鳥仔披翼飛起。原來係陂塘脣，走來一群細啞仔在該打水漂仔。坐在樹下擎等釣槓个男仔人，大聲罵：「有人在這釣魚仔，你兜孤盲頭在該變麼个齣事，毋好來這搞！」

月光蹶上天頂，在水摺地个合界，白鶴花⁴个清香跔等夜風散開來。夜呱仔⁵醒咧，昏哆昏哆仔⁶喊幾聲「嘎！嘎！嘎！」像烏鈕仔恁大个蜗蠕仔扭等尾泗水，臉身既經生出四支腳咧，在陂塘角尋位所上岸。蛇哥發現在水肚跳出來个烏影，黏時對草竇趁啊出來，開始追佢兜！

有人摺桃園喊做「千陂之鄉」，這肚底像碗公樣，大大細細个陂塘，全部係人工挖出來个。先民在開墾个過程肚盡艱苦，高不將挖陂塘來頓水蔭田。陂塘最多个時節，有萬過隻，也變成桃園當特殊个地理景色。每一隻陂塘都有自家个故事，當多人第一擺泗水、第一擺釣魚仔，都係在陂塘肚發生。

年堵年，跔等時代个流轉，桃園都市化个程度緊來緊高。有兜陂塘失忒蔭水个功能，一隻一隻分人屯忒，起做機場、學校，抑係公園咧。伸下來个陂塘，經過整頓，嘎有了新生命个延續，變成現代人休閒遶寮个好所在！

¹ 金若若仔：音 gim` na` na` er；金光閃閃。

² 水蓮花：音 shui` lien fa`；臺灣萍蓬草。

³ 鬥腳鳥：音 deu` giog diau`；高蹺鴿。

⁴ 白鶴花：音 pag` hog` fa`；野薑花。

⁵ 夜呱仔：音 rha` gua` er；夜鷺。

⁶ 昏哆昏哆仔：音 fun de fun de er；頭暈腦脹的。

112 年全國語文競賽客家語朗讀文章高中學生組（海陸腔）

編號 3 號

【幸福个味緒】黃美貞原作

老古人言：「食了五月粽，被骨正上棟。」五月節正過忒，當晝開始天時就熱到佇毋著，該時堵好係梅雨季節，落過水、起風咧，將就摻冷氣關忒，行到窗門脣感受熱天難得个涼風。除忒幸運看著天邊靚靚个七彩虹，還鼻得著馬膠路¹分日頭煎過、分雨水打過以後淡淡、香香个味道，臨暗頭窗門外背一陣一陣「搵搵搵——搵搵搵——」个蟬仔聲跔等清風傳落屋肚來。

佢想起還細時節，熱燻燻个下晝頭，佢這兜姊妹會摻隔壁鄰舍个細人仔伴共下搞，長下搞到斷烏，聽著阿姆開聲喊：「好轉來洗手食飯咧！」正盼得轉屋。

佢爸係客運司機，平常時愛輪班，所以總係暗晡頭八、九點正下班。當記得係堵好該日無伸麼个飯菜，佢爸會自家煮麵食。逐擺佢就先摻蒜頭礮礮仔剝到幼幼、滷一息豆油還過香油在碗公肚，續等摻煮好个麵撈起來，水泌燥倒在碗公肚，摻蒜頭、配頭共下攪分佢勻，該兩時係聽著佢爸問：「有麼人愛食麵無？」佢這兜就當暢，遽遽飄落灶下，你一口、佢一口，又賺著一餐香噴

噴个宵夜，食到飽餛飩仔，還幸福哪！佢爸摻伸个飯菜間等伸無幾多條个麵，儘採划落肚，就恁樣過一餐。

又還記得，熱天臨暗仔洗好身腳，等到食飽夜檢摻好、寫好作業、看一下電視，細人仔還細又好搞，差毋多到愛上眠床該下，又一身汗咧。頭擺屋下無恁好額，斯有一隻間房安有冷氣定定。阿姆會在睡目前半點鐘摻冷氣搥開來，等到大家愛睡該下，間房門打啊開來，斯有涼沁沁个冷氣吹來，歸屋人一下仔就睡落覺咧。

這幸福个滋味一直囿在佢个心肝肚，毋多知仔成人長大、做人阿姆以後，正知「賺錢可比針挑笏，使錢可比水推沙。」乜正體會爺哀頭擺辛苦畜大佢這兜細人仔，還過愛理一隻家哪有恁該？毋過該愛盡个責任摻義務，佢兜從來都毋識放忒過。

¹ 馬膠路：音 ma ga lu⁺；柏油路。

【頭回蹶大山】范振新原作

「避暑來去蹶百岳，愛無？」斯因為這句話，佢三兄弟斯跔等滿叔，共下去蹶人生个第一座大山。該兩時，佢還毋知蹶恁樣个高山有麼个特別，乜毋了解蹶三千米以上个山愛知得哪兜孔竅，佢這從細戴山肚个半桶水，還話著膠頭擺蹶个五指山、石門山這兜淺山仔爭七毋爭八¹，無頭無腦斯想跔等去，正經係細和尚仔唸金剛經——毋知頭又毋知尾。

記得該擺蹶个係池有山膠品田山，滿叔安排兩日兩夜。頭暗晡佢兜先歇在武陵農場，第二日打早六點就出發，按算斷烏前行到新達營地。頭下碼正開始蹶該下，佢話著自家个體力當好，平常乜有運動个習慣，所以行盡遽，想愛早一息蹶上山頭。無胚著，正行點零鐘斯佇毋著，歸身汗流脈落，強強會故氣毋出。

佢試著盡奇怪，這擺愛蹶山以前，佢還釘工逐日去運動坪練習，仰會還係恁恫？背尾正知，係因為山頂个氧氣較少，又愛背食糧、滾水、襖婆這兜，加加起來完²十公斤个東西，身體需要還較多个能量，正會行一細節就故大氣。該載，老弟乜膠佢共樣，

佢緊故大氣緊問滿叔：「會到吉？還有幾遠？」滿叔笑笑仔應講：「還吉得時哦，登山口就還吉到！加油！」聽著滿叔恁樣講，佢正經愛嗽無目汁，高不將膠自家个包袱擡起來刻耐仔續等行往上。滿叔又講：「毋好行恁遽，山又毋會走忒，定定仔行斯好，恁咧就頓恬下來歇睏，山頂个風景當靚哦！」

斷真，山頂个路彎彎幹幹，毋過見轉一隻彎斯有新个天地，在山肚滿哪仔都係好風光，尤其係對面个群山，在半山排遠遠看過去，一遍青里里，加勝青天膠白雲不時變化，每一分鐘、每一秒都像係無共樣个風景明信片。歸路還有鳥仔、蟲仔在該唧唧唧，佢斯在這大自然个音樂會裡肚，一頭享受山頂个美景；一頭手爬腳蹶繼續行。三不二時還做得看著鷓婆在天頂飛來飛去，感覺當自在、當自由。就在佢看到鷓神發琢呆个時節，忽然間聽著阿哥大嫲牯聲喊：「噯！看著三角點囉！」佢煞煞三步做兩步走等上。等蹶到山嶺頂，心肝肚个感動，害佢目汁險險流出來。

到該下佢正知，蹶山恁錫人个原因。

¹ 爭七毋爭八：音 zang` cid m zang` bad；差不多。

² 完：音 von；全部。

112 年全國語文競賽客家語朗讀文章高中學生組（海陸腔）

編號 5 號

【特別个水煎包】曾俊鑾原作

水煎包這種傳統點心滿哪仔都看得著，臺灣个水煎包大體係包高麗菜个，毋過當好運，佢在學校食過一種特別个水煎包。

下晝三點過後日頭轉影¹，天時較涼咧，下課同學會湊等去打籃球，成下仔會看著，一個背痾痾个外省老阿伯企在側角。佢捕等一隻籃仔，當像驚人知樣，把守一隻無法度講个秘密，佢出現个時節總係看東看西，等佢兜行前去，正細心細意掀開蒙在籃仔頂背个布仔，係一籃正起鑊無幾久還燒燒个水煎包。

佢兜當當在該轉骨²，做儘係飯豚仔³，到下晝早就枵到肚屎憑背囊咧，逐儕歡喜塵天撈錢相爭愛買。該無帶錢又想愛食个人愛仰結煞正好呢？佢兜會講：「這擺你先請，下二擺換佢請你，好無？」兩下半，本成疊到錐錐个水煎包就分人拿忒兩三層。

水煎包下背墊張紙，佢兜連洗手都懶，五隻手指頭托等，擘開嘴就齧⁴落去，當像毋會燒人樣，緊呵緊講：「好食！好食！」

水煎包有較赤⁵兜，老阿伯盡周到，既經薄薄仔先掌過辣油，佢个水煎包係正宗上海、蘇州个江南口味，用豬肉做心，摻等雞卵、蔥仔、香油、鹽這兜配料，係講你个嘴罈精，你還食得出有搯到綿綿个薑嫲，毋敢食辣个同學，乜試著好食。

佢兜緊食緊摻隔壁球場个人攞手，摻食到伸半隻个水煎包拿到高高，招佢兜愛買就愛遠兜，機會難得，過忒這擺，下二擺毋知愛等到哪時。結果，佢兜做儘分好食个水煎包錫⁶錫過來，連平常較有規矩个細妹仔乜湊陣走等過來，老阿伯个嘴角慢慢仔有一息仔笑。

毋過，一陣嘩嘩仔聲就像風時水⁷，摻這場正開始鬧熱个生理打到浪浪散，高中部个教官行過來咧，佢平常就無麼个笑容，這下還較面逼逼，大自家走到尾瀉屎，外省老阿伯乜摻籃仔攞起來，恬恬行往出，對哪搭仔出現，就對哪搭仔毋見忒去。

單淨水煎包个味緒還留在嘴肚。

¹ 日頭轉影：音 ngid teu zhon' rhang'；日影偏斜。

² 轉骨：音 zhon' gud；青春期長高的意思。

³ 飯豚仔：音 fon' tun er；喻發育中的青少年食量很大。

⁴ 齧：音 sen；咬。

⁵ 赤：音 chag；黃褐色，喻煎得表皮焦黃。

⁶ 錫：音 sia；吸引。

⁷ 風時水：音 fung' shi shui'；西北雨。

【整老屋】李得福原作

前一站仔，長下會看著阿公坐在廊仔下看通書¹，手町拿枝筆緊寫緊記，嘴肚還會緊唸這日仔當好，但係拆屋毋合。阿公講：「老屋个屋頂琉璃瓦舊咧，底層攤个防水塑膠布爛忒咧，所以逐間屋都漏水，該種防水布，細老鼠會弄落去作竇，盡遽壞，十過年就愛換一擺，當麻煩，揚瓦重奔个工錢當傷重。佢想換過鐵桁仔奔亞鉛餅，佢做主事人，一定愛選著膠佢無犯、無煞个好日腳正做得動工。」阿公擇日仔个學問，佢兜無學過乜聽毋識。

老屋在檳榔園裡背，用紅磚仔結到屋棟，烏麻戰笠²个樹桁頂，奔紅黃色个琉璃瓦，遠遠看去拗蠻靚。這係阿公後生時起个四合院，總共有十五間，但係戴無幾久，全家徙去街路做生理，老屋門門到今有四十零年咧，逐日斯伸阿公、阿婆會騎奧多拜轉去公廳拜阿公婆。前年阿公發覺天棚頂个樹桁仔，分白蟻蛀淨淨，逐間屋都斷幾下支，舊年想愛整，毋過年方³毋著整毋得，拖到今年大利東西个年方正做得整。

¹ 通書：音 tung`shu`；民間的曆法和擇日的參考典籍。

² 烏麻戰笠：音 vu`ma zhan`dad；密密麻麻的。

³ 年方：音 ngian fong`；每年的吉利方位。

年頭訂工轉老屋敬阿公婆前幾日，阿公會請清潔公司去拚掃一遍，方便子孫拜祖先，順續辦三張桌席，大家聚餐聯絡感情。毋過舊年開始，驚琉璃瓦會跌下來傷著人，兩片橫屋都有牽索仔，禁止人員落去，好得阿公婆有保佑，廳下个桁桷還好好，子孫正做得去拜。

禮拜日轉去菁園搵手摘菁仔，看著拆屋師傅拿等電鋸，坐在壁扇頂高膠桁仔鋸斷，瓦膠桁桷做下跌下來，砰砰滾當得人驚。小山貓个推土機膠廢棄物集中在禾埕，拖拉庫⁴停在路脣準備載去掉⁵；阿公行上行下、比手畫腳在該指揮，當像翕電影个導演在該翕一齣戲。阿婆買當多客家粿粿、紅粿、芋粿、粽仔，分做事个工人做點心，又泡一大茶罐麥茶分佢兜食。

過一駁仔，轉去菁園剪菁仔時，看著老屋已經變另外一種身影咧，深紅色个瓦型鐵皮奔好咧，日頭照在深紅色个鐵皮頂毫光燦爛，幾下个泥水師父在該修補壞忒个壁扇膠地泥，水電師傅共下在該整電火、巡水管。青色个檳榔園肚一座紅堡壘，係子子孫孫心靈个寄託，老屋修整前、修整後个形款永遠留在佢个心肝肚。

⁴ 拖拉庫：音 to+ la ku`；語源於日語「トラック」，卡車。

⁵ 掉：音 tiau`；丟掉。

【老屋屋下个風景】蕭瑞琪原作

臨晝邊，轉去老屋屋下遶遶仔。一行落屋肚，看著阿爸坐在矮凳仔町，報紙放在矮桌仔頂，棚等目鏡¹在該看國家大事；阿姆坐在竹交椅町，腳架在細矮圓凳頂高，目聚聚仔看等家庭副刊。日頭花對窗門斜斜晟落屋肚，恬靜恬靜，睡在桌頂个烏貓仔，兩隻腳還撇等報紙在該睡目，分佢个打門聲嚇一下，擘開目珠懶懶仔看過來，又續等睡佢个目。

老屋屋下有三條貓仔，全都係路脣拈來个。該兩時還係細貓子，正開目²無幾多日，分人用紙箱仔張等放在路脣草墩町。阿爸散步經過，聽著細細个喵！喵！喵聲，正發現這兜衰過个細貓子。佢斯摻細貓子帶轉屋下，倒一息牛乳在盤肚，細貓子鼻著牛乳味，搖搖擺擺爬到盤仔脣，用軟軟个舌嫵緊舐，牛乳還膏到鬍鬚斯變白鬚咧，當得人惜。三條貓子个毛色無共樣，一條像乳牛一搭烏一搭白，尤其四隻腳个腳趾頭前白白，當像著白襪樣，就摻佢安名「細白襪」；另外一條全身係烏金烏金个長毛，就喊佢「長毛仔」；還有一條生著柑仔色，又有一浪一浪个花紋，就安

到「細柑仔」。毋過阿姆無恁大神氣³記佢兜个名仔，就喊佢兜「花花个」、「長毛个」、「黃黃个」。

細貓子日見日大，變做活潑个大貓仔，長下會自家開窗門走出去遊遊野野，等到搞恁咧正對窗門鑽落來。貓仔本成係貓科動物，摻獅仔共樣有打獵个本等，雖然經過一萬年个馴化咧，但係本能無完全消失。所以，暗晡頭時常會走出去捉老鼠、透地龍、壁蛇仔，轉來放在門口；日時頭還會在陽臺晡鳥仔，見擺係看著佢恬索索仔跔在該，目金金仔看等屋頂，總會有飛毋掣个禾鷄仔、斑鳩、月鴿仔分佢打下來。

這駁仔轉去老屋屋下，總會看著三條貓仔目絲絲在該啄目睡，阿姆講：「這兜貓仔老咧，無幾好出去奈咧，逐日橫在屋肚睡目。」係照貓仔个年紀來算，佢兜也係高齡貓咧，逐朝晨，兩個看報紙个老人家摻三條啄目睡个老貓仔，就係老屋屋下个風景。

¹ 棚等目鏡：音 pang` nen` mug giang`；戴眼鏡，以裝氣派。

² 開目：音 koi` mug；動物初次張開眼睛。

³ 恁大神氣：音 an` tai` shin hi`；很費神。

112 年全國語文競賽客家語朗讀文章高中學生組（海陸腔）

編號 8 號

【一雙箸】黃秋枝原作

「好撿碗箸咧！」

佢俚係用箸个民族，從細就愛學會擎箸，學會擎箸之前，係爺哀挾分佢俚食。旨盡會使箸食飯該下，箸擎等搵上搵下，因為無熟絡划飯挾菜个技巧，嘎挾到叭叭跌；等到會使箸該下，又好擲擲仔這挾該挾，挾到歸碗自家一等好食个菜。

屋下世大人長下教講：「箸毋好恁精！好食个東西愛曉得勻等來大家食。」阿姆乜教講，箸係有生目珠个，佢俚想食哪樣就看準準正挾，毋好操起操轉¹、搵上搵下，愛注重衛生摺禮貌正好。還有，食飯時節，箸愛擎正來，愛遵守擎箸个規矩，千萬做毋得用箸敲碗、敲桌仔像乞食仔討食樣；手指公摺指人指愛夾核箸个上截，另外三隻手指自然彎彎對齊摺箸捉好勢，指人指毋好搵起來像指等人罵樣；毋好咬箸；箸乜做毋得插在飯碗个中央；食飯擎箸有盡多禁忌，毋好準搞。係無，世大人就會大聲哆：「無人教詔²係無？」過較嚴條个，就箸頭嫵敲啊去，該餐飯乜有可能分世大人咄下桌。

¹ 操起操轉：音 cauˋ hiˋ cauˋ zhoŋˊ；翻動來翻動去。

² 教詔：音 gauˋ zhoˋ；教養、管教。

盡記得，細人時節偈屋下个箸係竹仔做个，阿姆長透吩咐，好天个時節箸愛拿到日頭下晒，係無斯會上烏雞³，愛落嘴个東西儘採毋得，愛知「病對嘴入，禍對口出」个道理。所以，細人時，晒箸乜係偈个頭路，一支一支頭對頭、尾對尾排好勢拿到天下晒日頭。

頭擺人，留人客在屋下食飯乜會講：「糯米打糝罕得幾多時？便菜飯乜就加一雙『箸』定定。」斯愛人情好，食水乜甜，一雙「箸」增添了人摺人之間个交流摺感情。還記得，有一擺愛敬床公婆搵擺菜盤，偈就照佢俚食飯个規矩準備一雙箸，阿姆遽遽喊講摺箸拿轉去，相傳，敬床公婆毋使擎箸，係擎箸敬床公婆，床公婆會拿箸教示細人仔這種生趣个講法。

人講，箸一頭圓、一頭方就像天圓地方；手擎箸五隻手指愛上、中、下配合使用，代表天、地、人三才；箸一分為二，又合二為一，代表陰陽結合，包容、平衡、和諧。

³ 上烏雞：音 shoŋˋ vuˋ gaiˋ；物品因潮溼發霉而產生的黑點。

編號 9 號

【細日頭】胡明華原作

細日頭係阿生畜个鸚哥¹，兩片面頰卵有紅紅个圓箍仔，看起來就像細細个日頭，所以喊佢「細日頭」。佢个臉身白白，尾長長，頭那頂有一撮長長、黃黃梳到腦屎背个頭那毛，身形盡靚。

細日頭在鳥子時節就分阿生對店肚接到屋下，從佢歸身無毛軟頭扁摺²到翼胛毛生到亮亮齊齊，最親个就係阿生，見看著阿生，佢就歡喜塵天，暢到耐毋得，啾啾滾緊唱歌。佢長透企在阿生个拈食指³抑係肩頭頂高，不時佷兼來，用嘴輕輕仔啄阿生个面，西出一細截舌嫵咬佢，成時還會咬到耳砵去，乜長下在佢臉身脣迂來迂去，實在生趣。有一擺，阿生翕一張細日頭咬佢个面个自拍相片，細日頭看啊著，嘎又再過咬加一到，屋下人笑到貶轉來。

細日頭个毛正生齊个時節，識飛走一擺。該日阿生毋知哪條腸仔毋直，攞等鳥籠仔去公園，學人放鳥仔，妄想細日頭飛出去做得嘍佢再過飛轉來，又合想愛展風神。無想著鳥籠仔正打啊開

來，細日頭翼玻玻仔，黏時就飛到十二樓恁高，跔等就無影無跡咧。阿生心焦馬亂⁴，仰會尋去尋轉都尋無？佢歸暗晡睡毋落覺，天官光就緊拚拚仔再過去公園尋。佢有聲喊到無聲，嘴又燥肚又渴。好得皇天不負苦心人，包尾分環保人員在一頭樹頂尋著，一人一鳥正又過相逢。

前一駁仔，阿生試著細日頭大咧，就無細心照顧，斯顧自家个事，陪佢个時間緊來緊少。麼人知細日頭嘎開始背自家个毛，到有一日，兩片翼胛下總下擲到淨淨，就像人發病仔頭那啟毛光頂樣，這時阿生正緊張起來，遽遽送去鳥仔醫院。衰過正得啊！藥錢比人看病還較貴！

人講「戇戇戇，豬肉煮米醬；精精精，無屋好居身。」阿生原旦還話著自家一等精，省忒陪細日頭个時間就賺著時間趕事，毋會仰般，結果害了細日頭，乜害著自家，正經係假精無錢賺。

這擺阿生學乖咧，開始認真照顧細日頭，還分佢戴伊麗莎白頸圈，避免佢又過咬翼胛下；乜知得原來做鸚哥个主人愛用心照顧好勢；不管佢到底係快樂抑係悲傷？係發悶也係緊張？係肚屎枵抑係嘴渴？甚至，佢係毋係慍悴？都愛耐心做伴，恁樣正會人鳥兩相安哪！

¹ 鸚哥：音 en` go`；鸚鵡。

² 軟頭扁摺：音 ngion` teu bien` zhab；此處指初生時長得醜醜的、皮膚皺皺的樣子。

³ 拈食指：音 ngiam` shid` zhi`；食指。

⁴ 心焦馬亂：音 sim` ziau` ma` lon+；心中慌亂無主。

【長薯仔】徐秀英原作

前一駁仔鼻空頭髮一隻長薯仔，又紅又腫，當杈眼¹又動佢毋得，一想著愛帶等佢出出入入，心情都煩躁起來！做學生仔儕功課壓力大，長透目無好睡恁足，有人講係火氣大引起个，有人講係面無洗淨，毋過，同學都知，這係後生人个專利，記錄佢兜个青春，長薯仔个名又安到青春痘。

長薯仔係得人畏个違章建築，就像在該平整个路面翹起來个「人孔蓋」；像光滑个球仔面頂該粒撇毋下去个嘮風嘴。若係歸面生到密密又貢膿，這時節定著愛注意感染个風險，係無正經就會分佢搵到無結無煞，斯驚一無注意，生著白幼个面變成礫礫砣砣个「月球表面」，到該時節，自家就刻耐仔「戴月球」咧。

為著愛打敗長薯仔外星人个攻擊，佢決定進行作戰計劃，經驗豐富个阿姆，順利登上指揮官个大位。因為鼻空頭該隻最大隻、最痛，盲熟又撇毋得个長薯仔，阿姆拿出佢个秘密武器，用綠豆粉摻蜂糖兩項攪共下，膏在佢个鼻空頭，佢問阿姆講，鼻空會分蟻公扛走無？阿姆緊笑緊瞞²佢應講：「佢頭擺就係恁樣膏好

个，比起你這下个樣仔還較慘哦！」。

阿姆又講，食个東西做毋得忒躁，火氣大長薯仔正會緊發。佢摻同學下課个時節，固定會去賣鹽酥雞个攤仔買雞排，焗到酥酥、香香个雞排，單淨想著就會流口水，尤其愛赴暗晡頭个課，雞排係當多學生仔最好个選擇。阿姆長下交代毋好緊食這兜有个無个，買隻麵包先打肚底，轉來正食正餐乜做得。毋過，就係當難管這張嘴啊！為著自家一面个春光，佢心肝肚想，死馬當做生馬醫，就聽阿姆个好咧！乜來調整一下飲食个習慣。阿姆个秘密武器毋單淨綠豆粉摻蜂糖，還有笏瓜、油蔥³、黃連，菊花茶……，膏个、食个樣樣齊。

逐暗晡洗好身到睡目个一細段時間，佢會搞手機放鬆心情。這時節，有責任心个指揮官——阿姆，定著會來推門，佢在門背大聲放送：「無睡飽，長薯仔毋會好哦！」雖然抗痘个過程有息仔難耐，好得，佢這下个面有緊來緊亮線咧。

¹ 杈眼：音 ca⁺ ngan^ˊ；礙眼。

² 瞞：音 him；瞪人。

³ 油蔥：音 rhiu cung^ˋ；蘆薈。